



## “MEMPERTAHAN NEGARA TUNTUTAN ISLAM”

الْحَمْدُ لِلَّهِ الْقَائِلِ: الَّذِينَ ءَامَنُوا وَهَا جَرُوا وَجَاهُوا فِي سَبِيلِ اللَّهِ بِأَمْوَالِهِمْ وَأَنفُسِهِمْ أَعْظَمُ دَرَجَةً عِنْدَ اللَّهِ وَأُولَئِكَ هُمُ الْفَائِزُونَ ﴿٢٣﴾

أَشْهَدُ أَنْ لَا إِلَهَ إِلَّا اللَّهُ وَحْدَهُ، لَا شَرِيكَ لَهُ وَأَشْهَدُ أَنَّ مُحَمَّداً عَبْدُهُ، وَرَسُولُهُ. اللَّهُمَّ صَلِّ وَسِلِّمْ عَلَى سَيِّدِنَا مُحَمَّدٍ وَعَلَى آلِهِ وَاصْحَابِهِ أَجْمَعِينَ. أَمَّا بَعْدُ، فِيَآ أَيُّهَا الْمُسْلِمُونَ! اتَّقُوا اللَّهَ، أُوْصِيْكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى: يَأَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَ إِلَّا وَأَنْتُمْ مُسْلِمُونَ.

Sidang Jumaat yang Dirahmati Allah.



Marilah kita bertakwa kehadrat Allah SWT dengan sebenar-benarnya, melalui pelaksanaan segala yang diperintah-Nya dan meninggalkan segala larangan-Nya. Sesungguhnya takwa itu adalah paksi dan tonggak terpenting, dalam usaha ke arah menjana kemuliaan diri dan ummah. Begitu juga dalam mengerakkan perjuangan, demi kejayaan di dunia dan di akhirat.

Marilah sama-sama kita menghayati khutbah hari ini yang bertajuk **"MEMPERTAHAN NEGARA TUNTUTAN ISLAM"**.

### **Muslimin yang mulia,**

Sambutan Hari Pahlawan cukup melakar pengertian kepada kita, sebagai anak bangsa yang cinta akan agama, bangsa dan Negara. Pahlawan Negara sama ada terdiri daripada warga Angkatan Tentera Malaysia, Polis Diraja Malaysia, dan lain-lain agensi keselamatan, serta individu yang secara bersama, mempertahankan keselamatan dan kedaulatan Negara. Demikian juga mereka telah berjuang dan berkorban untuk kesejahteraan ummah dan Negara.

### **Sidang Jumaat yang dirahmati Allah SWT,**

Sebagai pewaris Negara, kita sedar bahawa pengorbanan generasi terdahulu cukup berharga sekali. Maka, menjadi tanggungjawab kita ialah bersedia meneruskan serta memelihara semangat kepahlawanan, menyusun langkah bersama, mengatur perpaduan bangsa dan membangun kecemerlangan negara. Demikian persediaan yang perlu dibuat untuk menjadi sebuah Negara yang aman dan makmur serta mendapat keampunan dan keredaan Allah SWT.

Firman Allah SWT dalam surah al-Anfal ayat 60:



وَأَعِدُّوا لَهُم مَا أَسْتَطَعْتُم مِنْ قُوَّةٍ وَمِنْ رِبَاطِ  
الْخَيْلِ تُرْهِبُونَ بِهِ عَدُوَّ اللَّهِ وَعَدُوَّكُمْ وَءَاخْرِينَ  
مِنْ دُونِهِمْ لَا تَعْلَمُونَهُمُ اللَّهُ يَعْلَمُهُمْ وَمَا تُنْفِقُوا مِنْ  
شَيْءٍ فِي سَبِيلِ اللَّهِ يُوَافِي إِلَيْكُمْ وَأَنْتُمْ لَا تُظْلَمُونَ



*"Dan bersedia lah untuk menghadapi mereka (musuh-musuh Islam) dengan segala jenis kekuatan yang termampu, daripada kuda-kuda perang yang ditambat untuk menggerunkan musuh Allah dan musuh kamu serta musuh-musuh selain mereka yang kamu tidak mengetahuinya; sedangkan Allah mengetahuinya. Apa sahaja yang kamu nafkahkan pada jalan Allah, nescaya akan disempurnakan balasannya kepada kamu dan kamu tidak akan dizalimi".*

Sesungguhnya, keamanan dan keharmonian yang diraih hari ini tidak datang sekilip mata, tetapi disumbangkan oleh titik peluh dan titisan darah pejuang silam, yang melakar cetusan kejayaan Negara kita hari ini. Mampukah kita menikmati suasana hari ini tanpa pengorbanan orang yang terdahulu? Sudah pasti tidak. Justeru, kita wajar mengambil iktibar dan tauladan di atas semangat juang yang ditinggalkan oleh pejuang-pejuang terdahulu, yang telah berkorban apa sahaja untuk mengecapi misi dan visi Negara.

Rakyat Malaysia perlu memberi pengiktirafan sewajarnya kepada barisan pahlawan Negara. Perjuangan mereka ini sepatutnya menyedarkan kita, betapa



kemerdekaan yang diperjuang, agama yang dijunjung, Negara yang berdaulat, perlu dipertahankan, walau dengan nyawa sekalipun. Kesanggupan mempertahankan kedaulatan Negara, adalah satu kewajipan.

### **Muslimin yang dirahmati Allah,**

Sejarah telah membuktikan bahawa kekuatan tentera Islam dahulu, adalah berasaskan daripada kekuatan iman dan ikhlas mereka berjuang kerana Allah SWT dan syariat-Nya, serta ketataan kepada kepimpinan. Mereka berpegang teguh kepada ajaran Islam supaya tidak hilang pedoman.

Firman Allah SWT dalam surah al-An'am ayat 153:

وَإِنَّ هَذَا صِرَاطٌ مُسْتَقِيمًا فَاتَّبِعُوهُ وَلَا تَتَّبِعُوا  
آلَّسْبُلَ فَتَفَرَّقَ بِكُمْ عَنْ سَبِيلِهِ حَذَلُكُمْ وَصَنْكُمْ بِهِ  
لَعَلَّكُمْ تَتَّقُونَ

*“Dan sesungguhnya inilah jalan-Ku (agama Islam) yang lurus. Maka hendaklah kamu menurutnya dan janganlah kamu menurut jalan-jalan (yang lain daripada Islam), kerana jalan-jalan (yang lain itu) memisahkan kamu daripada jalan Allah. Itulah yang diperintahkan oleh Allah kepada kamu, mudah-mudahan kamu bertakwa”.*

Sesungguhnya fakta yang menyumbang kepada jihad ke jalan Allah ini sangat berkait rapat dengan keimanan, sifat jati diri, perasaan kasih sayang, kesetiaan dan pengorbanan seseorang kepada Agama dan tanah air secara menyeluruh.



## **Muslimin yang dirahmati Allah,**

Sejarah menunjukkan bahawa kegigihan tentera Islam sejak zaman kegemilangan Islam hingga semasa Kerajaan Umaiyyah, Abbasiyyah dan Uthmaniah Turki untuk menawan Kota Konstantinopel (Istanbul), serta kehebatan Sultan Muhammad al-Fateh yang menjadi Sultan Kerajaan Uthmaniah Turki wajar dicontohi. Mereka adalah contoh tentera Konstantinopel, pahlawan yang kuat beriman, tawaduk, bijak, pintar dan berani, telah Berjaya memimpin tentera Islam menawan Kota Konstantinopel daripada Kerajaan Rom.

Kejatuhan kota itu memudahkan dan membuka laluan yang menjadi pintu masuk penyebaran Islam di Eropah. Antara kata-kata beliau pada hari ke-53 kepungan untuk menawan Kota Konstantinopel ialah; “ *Wahai tenteraku, aku bersedia untuk mati di jalan Allah, sesiapa yang mahu syahid, ikutilah aku*”. Menurut riwayatnya, beliau adalah sangat taat kepada perintah Allah dan tidak pernah meninggalkan solat fardu atau sunat rawatib dan tahajjud. Dengan izin Allah dia mampu bertahan dalam apa juga keadaan dan tidak mudah mengaku kalah. Begitu juga pahlawan Agung Salahuddin al-Ayyubi yang mampu mengalahkan tentera Salibiyyah dalam jumlah yang besar.

Demikianlah kehebatan generasi pahlawan terdahulu yang mengutamakan keteguhan iman dalam mempertahankan Negara.

## **Sidang Jumaat yang dirahmati Allah,**

Menurut Dr. Yusuf al Qardawi, seorang ulama’ tersohor dewasa ini dalam bukunya “Al Iman Wal Hayat”, menyatakan bahawa pokok kekuatan orang beriman ialah :

**Pertama : Mempercayai Allah.**



Orang beriman itu kuat, kerana dia memperoleh kekuatan dan bergantung kepada Allah semata-mata. Meyakini bahawa Allah bersama dengannya di mana sahaja dia berada. Bahkan Allah menolong orang-orang mukmin yang berpegang teguh dengan hikmah dan kebijaksanaan-Nya.

### **Kedua : Mempercayai Kebenaran.**

Orang beriman mengambil kekuatan daripada kebenaran yang dianutinya. Dia tidak bekerja kerana dorongan syahwat dan nafsu, bukan kerana kepentingan peribadi, bukan kerana mempertahankan satu golongan dan bukan pula kerana hendak menganiaya dan melanggar hak orang lain.

### **Ketiga : Mempercayai Qadar.**

Orang beriman memperoleh kekuatan daripada kepercayaannya terhadap qadar. Dia mengetahui bahawa segala cubaan yang datang menimpanya, adalah dengan izin Allah. Jika manusia dan jin berkumpul untuk mendatangkan sesuatu musibah, nescaya tidak akan memberikan bahaya, melainkan dengan sesuatu yang telah diputuskan oleh Allah untuknya.

### **Keempat : Mempercayai Persaudaraan.**

Orang beriman itu memperoleh kekuatan kerana berjuang bersama saudara-saudaranya yang beriman, untuk membantu dan mempertahankan negara saudara-saudaranya yang beriman.

### **Sidang Jumaat yang berbahagia,**

Sempena menyambut Hari Pahlawan pada tahun ini, marilah kita bersama-sama mempertahankan negara dengan mengambil langkah-langkah seperti berikut;



1. Kita hendaklah semarakkan iltizam, cintakan negara berdasarkan prinsip-prinsip Islam sebagai pejuang *Fi Sabillillah*.
2. Pahlawan negara hendaklah sentiasa mempersiapkan diri dengan iman yang mantap, semangat yang sentiasa berkobar-kobar dalam menyempurnakan amanah dan peranan sebagai perwira.
3. Umat Islam hendaklah bersatu padu, berkasih sayang, memperkuuh persaudaraan yang sejati untuk mencipta kekuatan ke arah meninggikan syiar Islam, demi mempertahankan agama, bangsa dan negara.
4. Umat Islam sewajarnya mendoakan Pahlawan Negara, baik yang telah syahid atau kembali menghadap Ilahi dengan iringan doa agar roh mereka mendapat rahmat dan keampunan. Bagi para pahlawan yang masih gagah, berdiri mengibarkan panji-panji perjuangan ini, demi negara yang dicintai, kita doakan agar mereka sentiasa istiqamah mempertahankan setiap inci bumi pertiwi ini walaupun dengan darah dan nyawa sebagai ganti.

أَعُوذُ بِاللَّهِ مِنَ الشَّيْطَنِ الرَّجِيمِ  
وَلَا تَقُولُوا لِمَنْ يُقْتَلُ فِي سَبِيلِ اللَّهِ أَمْوَاتٌ بَلْ  
أَحْيَاءٌ وَلِكُنْ لَا تَشْعُرُونَ



"Dan janganlah kamu mengatakan terhadap sesiapa yang gugur dalam perjuangan membela agama Allah itu orang mati, bahkan mereka itu hidup tetapi kamu tidak dapat menyadarinya (mengetahui keadaan mereka)".

(Surah Al-Baqarah: 154).

بَارَكَ اللَّهُ لِيْ وَلَكُمْ بِالْقُرْآنِ الْعَظِيمِ،  
وَنَفَعَنِيْ وَإِيَّا كُمْ بِمَا فِيهِ مِنَ الْآيَاتِ وَالذِّكْرِ  
الْحَكِيمِ وَتَقْبِيلَ مِنِيْ وَمِنْكُمْ تِلَاقُتُهُوَ إِنَّهُ هُوَ  
السَّمِيعُ الْعَلِيمُ.

أَقُولُ قَوْلِيْ هَذَا وَأَسْتَغْفِرُ اللَّهَ الْعَظِيمَ لِيْ  
وَلَكُمْ وَلِسَائِرِ الْمُسْلِمِينَ وَالْمُسْلِمَاتِ،  
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



## KHUTBAH KEDUA

الْحَمْدُ لِلّٰهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنَّ لَا إِلَهَ إِلَّا اللّٰهُ وَحْدَهُ، لَا  
شَرِيكَ لَهُ، وَأَشْهَدُ أَنَّ مُحَمَّداً عَبْدُهُ، وَرَسُولُهُ.  
اللّٰهُمَّ صَلِّ وَسِلِّمْ وَبَارِكْ عَلٰى سَيِّدِنَا مُحَمَّدٍ  
وَعَلٰى آلِهِ وَصَحْبِهِ وَمَنْ تَبَعَهُمْ بِإِحْسَانٍ إِلَى  
يَوْمِ الدِّينِ. أَمَّا بَعْدُ، فَيَا عِبَادَ اللّٰهِ، اتَّقُوا اللّٰهَ فَقَدْ  
فَازَ الْمُتَّقُونَ.

Sidang Jumaat yang dirahmati Allah SWT,

Mimbar Jumaat sekali lagi berpesan bahawa Islam mengajar umatnya supaya bersikap sederhana dalam segala amalan dan tindakan. Pada masa yang sama umat Islam disaran supaya menjauhi sebarang bentuk perbuatan ekstremis yang kesannya akan menjadikan keharmonian, perpaduan, keselamatan ummah dan Negara. Tindakan ekstremis juga boleh memberikan tanggapan negatif terhadap kesucian dan kemuliaan agama islam. Sebaliknya seluruh umat islam amatlah dituntut agar menampilkkan kemuliaan akhlak, sikap dan keperibadian tinggi sebagai muslim sejati agar



umum mengetahui bahawa Rasulullah SAW diutus dan Islam yang diperjuangkan adalah rahmat bagi seluruh umat dan sekalian alam.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَأْتِيهَا  
الَّذِينَ آمَنُوا صَلَوَةً عَلَيْهِ وَسَلَّمُوا تَسْلِيمًا. اللَّهُمَّ  
صَلِّ وَسَلِّمْ عَلَى سَيِّدِ الْمُرْسَلِينَ وَارْضِ اللَّهُمَّ عَنْ  
أَصْحَابِهِ وَقَرَابَتِهِ وَأَزْوَاجِهِ وَذُرِّيَّاتِهِ أَجْمَعِينَ.  
الَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ  
وَالْمُؤْمِنَاتِ الْأَحْيَاء مِنْهُمْ وَالْأَمْوَاتِ، إِنَّكَ سَمِيعٌ  
قَرِيبٌ مُجِيبٌ الدَّعَوَاتِ وَيَا قَاضِيَ الْحَاجَاتِ.  
الَّهُمَّ إِنَا نَسْأَلُكَ وَنَتَوَسَّلُ إِلَيْكَ بَنَيْكَ الْأَمِينِ،  
وَنَسْأَلُكَ بِاسْمَائِكَ الْحُسْنَى وَصِفَاتِكَ الْعُظْمَى  
أَنْ تَحْفَظَ بَعِينَ عِنَائِتِكَ الرَّبَّانِيَّةَ وَبِحِفْظِ وَقَائِتِكَ  
الصَّمَدَانِيَّةَ، حَلَالَةَ مَلِكِنَا الْمُعَظَّمِ سُلْطَانِ



سَلَّٰعُورُ، سُلْطَانُ شَرَفُ الدِّينِ ادْرِيسُ شَاهُ  
الْحَاجُ ابْنُ الْمَرْحُومِ سُلْطَانُ صَلَاحُ الدِّينِ عَبْدُ  
الْعَزِيزُ شَاهُ الْحَاجُ. اللَّهُمَّ أَدِمِ الْعَوْنَ وَالْهَدَايَةَ  
وَالْتَّوْفِيقَ، وَالصِّحَّةَ وَالسَّلَامَةَ مِنْكَ، لِوَلِيِّ عَهْدِ  
سَلَّٰعُورُ، تَغْكُو أَمِيرَ شَاهِ ابْنِ السُّلْطَانِ شَرَفُ  
الْدِينِ ادْرِيسُ شَاهُ الْحَاجُ فِي أَمْنٍ وَصَلَاحٍ وَعَافِيَةٍ  
بِمَنْكَ وَكَرَمِكَ يَا ذَالْجَلَالَ وَالْإِكْرَامِ. اللَّهُمَّ أَطْلِ  
عُمَرَهُمَا مُصْلِحَيْنَ لِلْمُوَظَّفِينَ وَالرَّعِيَّةَ وَالْبِلَادِ،  
وَبَلِّغْ مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadrat-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkuuhkan negara umat Islam khususnya negeri Selangor, sebagai negeri yang maju, sejahtera dan berkebajikan.

Justeru kami pohon kehadrat-Mu ya Allah, tetapkanlah iman kami, terimalah amalan kami, kukuhkanlah perpaduan kami, murahkanlah rezeki



kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, kembalikanlah kami ke jalan yang Engku redhai, lindungilah kami daripada bala bencana dan ujian-Mu yang berat supaya dengan demikian, negeri kami akan sentiasa bertambah makmur dan berkat.

Ya Allah, kami pohon kehadratmu, mantapkanlah pegangan kami menurut ajaran Ahli Sunnah Wal Jamaah dan peliharalah kami daripada amalan dan akidah yang menyeleweng dan sesat seperti fahaman syiah yang melampau dan Qadyani serta lain-lain fahaman.

Ya Allah, bukakanlah hati kami untuk mendirikan solat fardhu lima waktu, menunaikan zakat dan kefarduan yang lain. Berkatilah hidup orang-orang yang melaksanakan zakat dan menyayangi fakir miskin serta mereka yang menginfakkan harta untuk Tabung Amanah Pembangunan Islam Selangor dengan ganjaran pahala yang berkekalan hingga ke hari akhirat.

Demikian juga ya Allah, tambah dan luaskanlah rezeki orang yang mewakafkan hartanya, terimalah wakaf mereka dengan ganjaran pahala yang berkekalan hingga ke hari akhirat.

رَبَّنَا هَبْ لَنَا مِنْ أَرْوَاحِنَا وَذُرِّيَّتِنَا قُرْةً أَعْيُنٍ  
وَأَجْعَلْنَا لِلْمُتَّقِينَ إِمَامًا. رَبَّنَا إَاتِنَا فِي الدُّنْيَا  
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. عِبَادُ  
اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ  
ذِي



الْقُرَبَىٰ وَيَنْهَا عَنِ الْفَحْشَاءِ وَالْمُنْكَرِ وَالْبَغْيِ  
يَعِظُّكُمْ لَعَلَّكُمْ تَذَكَّرُونَ ﴿٩﴾

فَادْكُرُوا اللَّهَ الْعَظِيمَ يَدْكُرُكُمْ وَاسْكُرُوهُ عَلَىٰ  
نَعْمَهِ يَزْدَكُمْ، وَاسْأَلُوهُ مِنْ فَضْلِهِ يُعْطِكُمْ  
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.

JAIS/Nurul \*\*  
22.07.2015